

# Il giuven Placi Condrau

Autor(en): **Müller, Iso / Maissen, F.**

Objektyp: **Article**

Zeitschrift: **Annalas da la Societad Retorumantscha**

Band (Jahr): **80 (1967)**

PDF erstellt am: **06.08.2024**

Persistenter Link: <https://doi.org/10.5169/seals-227957>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# Il giuven Placi Condrau

da P. Iso Müller

versiun rom. F. Maissen

## 1. Famiglia e gimnasi

La historia grischuna dil temps medieval e dil baroc raschuna a nus savens dils de Castelberg, de Latour, dils de Caprez e Maissen, mai mo dils Condrau. Ei setracta pia buca d'ina famiglia vegl-aristocrata, mobein d'ina nova, sauna e nunduvrada famiglia purila tua-tschina, che compara per dapli la revoluziun franzosa sin la tribuna dalla politica. Decidenta ei cheu la persuna da *Gion Fidel Condrau* (1784—1843), che ei secolocaus da Rueras a Mustér, nua ch'el ha baghegiu ina tschécca casa-lenn, ella quala el menava era ustria. Quella senumnavava pli baul «Zum Löwen» e senumna oz «Stiva grischuna». Igl intront enconuscha aunc beinenqual memoria alla famiglia possessura. Aschia vesa ins vid la pegna-scalegl la iniziala F C (Fidel Condrau) ed il datum 1801. L'arma Condrau salida era dil plantschiu dalla stiva davon cun igl anniversari 1804.<sup>1</sup> Al giebel meridional dalla casa legian ins F C cugl anniversari 1812 (u 1817). Gion Fidel Condrau ha contonschiu igl onn 1814 la dignitad da mistral dalla Cadi, quei denton sut pauc legreivlas circumstanzias. Il mistral en uffeci, Gion Paul Frisch da Zignau era morts gia treis meins suenter sia elecziun. Ei ha duvrau in cumin extraordinari per eleger il successur. Quei cumin ha giu liug ils 21 da november 1814. Denton, dapli il 17. tschentaner saveva negin vegnir mistral per nuot ed era Gion Fidel Condrau ha stoviu empermetter da pagar ils cuosts da cumin.<sup>2</sup>

<sup>1</sup> E. Poeschel, *Die Kunstdenkmäler des Kantons Graubünden* 5 (1943) 94—95

<sup>2</sup> *Il Glogn* 1944, pg. 104—105

Duront il bienni d'uffeci da mistral Condrau (1814—1816) ei naschiu ina penibla dispeta denter il cumin e la claustra, denter il vitg e l'abbazia. Condrau, che patertgava progressistic-democraticamein, ha priu partida encunter ils dretgs feudals dalla claustra, schizun encunter il dretg dad jerta e da cumpra dalla casa da Diu. Tuttavia representava el cun peisa sia opiniun, che la claustra seigi obligada da dar scola. Ella calira dil combat ha el inaga schizun pretendiu, che la claustra hagi mo tratg neutier bettleraglia. Quei fuva ina veglia reproscha, che cunteneva denton era in laud agl operar caritativ dalla abbazia.<sup>3</sup> Tals combats eran denton nunevitabels dil temps dalla risviulta revoluzionara dil feudalissem alla democrazia. Vegl e niev uregiavan inencunter l'auter, entochen che in niev moderau uorden ei sortius ordlunder.

Gion Fidel Condrau era maridau en emprema lètg cun Castgina Bundi, che ha schenghegiu ad el sis affons; Augustin (1811) Giachen Antoni (1814), Placi Sigisbert (22. fen. 1819), Rosa (1816), Gion Fidel (1821) e Benedetg Mihèl (1824). En secunda lètg ei mistral Condrau seligiau cun la tuatschina Maria Barla Catrina Monn. Da quella lètg deriva igl affon Giachen Giusep (1832).<sup>4</sup>

Nus intendin cheu buca da scriver ina historia da famiglia extendida e perquei serestrenschin nus sulettamein a prender cuortamein en egl treis fargliuns dil Placi e quei sco empren il vegl, numnadamein *Augustin Condrau* (1811—1887). Quel ha studigiau igl empren en claustra a Mustér ed ei lu serendus a Friburg al collegi dils gesuits, nua ch'el ha frequentau 1829/30 ils cuors filosofics.<sup>5</sup> Sinquei eis el sededicaus al studi medicinal a Turitg e Basel, Minca e Vienna per lu operar a Mustér sco medi praticont. Denton eis el igl onn 1869 seretratgs totalmein da sia practica, buca per ruassar, mobein per sededicar entiramein alla politica. Gia 1843 eis el staus president da vischnaunca da Mustér. Sco tal era el sededicaus fetg al migliorament dallas relaziuns da scola e dil pau-

<sup>3</sup> Bündner Monatsblatt 1965 pg. 195—196, 199, 204, 212, 216, 252—253, 261

<sup>4</sup> Per la historia da famiglia vein nus duvrau ils cudischs parochials da Mustér e principalmein igl archiv da famiglia tier cuss. naz. dr. Giusep Condrau, Mustér, che ha mess buntadeivlamein a nus a disposiziun il material. Nua ch'ei vegn buca indicau in auter liug, setracta ei da documents ord quest archiv Condrau.

<sup>5</sup> Comp. F. Maissen, Bündner Studenten am Kolleg in Freiburg, Freiburger Geschichtsblätter 1957/58, pg. 122

peresser. Cun pintgas interrupziuns ei dr. Augustin staus el cussegl grond da 1844—1881. 1848—1852 representa el il cumin sco mistral. Ella regenza grischuna eis el 1868—1869, 1872—73 e 1881.<sup>6</sup> En fatgs da finanzas valeva el per zun capavels ed el sedistingueva sco zun practic administratur. Buns observaturs, che enconuschevan aunc el, descrivan el sco in fin diplomat, che capeva da disputar ruasseivlamein, beinduras cun satira murdenta, ch'ei eri in plascher d'udir el. Bugen fimava el leutier sia pipa da miola mond culs mauns en sac da stiva sidengiu.<sup>7</sup> Sia cuorsa terrestre ha el concludiu ils 19 da december 1887.

Sper Augustin menzionein nus aunc la sora Rosa, ch'era maridada cun in professor da musica tudestg, Josef Burtscher (1812—1866). Ins sedamonda cuninaga, daco ch'ei seigi vegniu a questa lètg. Burtscher era derivonts da Bingen, ha studegiau a Hedingen ed a Constanza ed era seschus engaschar sco professor da musica alla scola cantunala catolica a Mustér da 1838—1842. Cheu ha el empriu d'enconuscher ella casa Condrau la feglia Rosa e las nozzas han giu liug 1846. Denton eis el lu seretratgs da Mustér ed ei returnaus en sia patria per operar sco professor da musica a Hedingen e sco cantor dalla baselgia da S. Stiafen a Sigmaringen, nua ch'el ei morts 1866.<sup>8</sup>

Sco gia menziunau, ei *Giachen Giusep Condrau* (1832—1868) derivonts dalla secunda lètg. El para dad haver artau da siu bab ina aveina administrativa e politica. A Tübingen eis el sededicaus a studis da giurisprudenza. Egl archiv Condrau a Mustér sesanfla aunc in cudisch screts amaun cul tetel: «Politik bei Professor Dr. Helferich. Sommersemester 1853, Tübingen, den 19. April.» Il manuscret tracta da constituziun e d'administraziun, da scola e militer.<sup>9</sup> Arrivaus ella patria ha el contonschiu il manti tgietschen dalla mi-

<sup>6</sup> J. Robbi, Die Landespräsidenten des Kantons Graubünden, 1917, pg. 24—25. Era leu, pg. 25—26, notizias biograficas sur il feagl dil medem num, dr. med. Augustin Condrau (1846—1928).

<sup>7</sup> Reminiscenzas d'in vegl curant da Mustér. Mustér 1929 pg. 4—5

<sup>8</sup> Surlunder ina brev da Pl. Condrau dils 9 da mars 1866, alla quala il priedi funeral dil plevon ei admess.

<sup>9</sup> Sur dil professor ei stau d'eruir nuot. Forsa apparteneva el enzaco alla famiglia da Johann Jakob Helferich (1692—1750), che doceva alla universiad da Tübingen giurisprudenza da 1729—1750. Allgemeine deutsche Biographie 11 (1880) 687—688

stralia, il qual el ha salvau da 1857—1861. Cun quella lètq sesparta la famiglia en duas lingias: quella dils giurists e quella dils miedis, ch'entscheiva cun dr. Augustin Condrau.

Ed ussa sevulvein nus viers *Placi Condrau*, il tierz affon da mistral Gion Fidel. Naschius ils 22 da fenadur 1819 ha el da batten obteniu il num ual dad omisdus patrums dalla claustra e dalla Cadi s. Placi e s. Sigisbert. El sez senumnava adina mo cul pli cuort e pli romontsch «Placi». Suenter haver frequentau la scola dil vitg, va el aunc alla *scola cantunala catolica* dil Grischun, ch'ei vegnida translocada 1833 da Cuera a Mustér. Cheu docevan ton paders sco laics. Igl emprem ei la scola stada sut la direcziun dil rector Johannes Probst, in convertit bernès, che veva mo in bratsch ed era perquei mo diacon, buca sacerdot. Dapli igl atun 1837 suonda el sco rector *Peter Kaiser*, al qual nus vegnin aunc a stover returnar.

En quella scola catolica cantunala vegn il giuven Placi Condrau. Igl emprem frequenta el 1835/36 la scola reala, ella quala ei vegneva era gia dociu franzos e talian. Igl onn 1836/37 anflein nus el ella 2. latina. Igl attestat dils 20 d'uost 1837, ch'ei aunc suttascrets, sco quel digl onn avon, dal rector Probst, ei tut sursemnaus dalla nota «fetg bien». Sulet en latin, ch'el veva buca giu avon ed en cant, nua ch'el disponeva mo d'ina fleivla vusch, anflein nus la nota «bien». Malgrad ch'igl ei vegniu ella 3. latina aunc il lungatg grec vitier, ha Placi bunamein en tuts roms l'emprema nota. Igl attestat da 1838 ha gia rector Kaiser suttascret. La 4. u la 5. classa para Placi dad haver sursegliu, pertgei pèr 1840 documentescha rector Kaiser el gia per la 6. classa. Ei croda en egl, che Condrau ha absolviu ses studis zun bein era els roms matematics, buca mo els linguistics. El disponeva pia da duns ulivai.

Ord notas sulettas san ins strusch eruir ina caratteristica viva. Pli bia colur resplenda denton ord la predilecziun per certs professers. Cheu ei perinaga *dr. Ignaz Christian Schwarz*, da Bamberg da numnar, in romanticher tudestg cun tgierp ed olma, beincudischius cun la litteratura tudestga, in grond amator dalla historia, denton era in um empau sensibel. Quel ha schau representar 1838 sin la tribuna claustrala il Tell da Schiller.<sup>10</sup> Alla influenza da Schwarz eis ei

<sup>10</sup> Sur da Schwarz mira *Zeitschrift für Schweizerische Geschichte* 25 (1945) 66 — 99

dad attribuir, che Placi Condrau ha componiu la poesia «Das Lied vom Schwerte», che sepusa bein empau vid la canzun dil zenn da Schiller, mo che munta tuttina per in scolar romontsch ina respectabla prestaziun. Il giuven autur ha sez declamau sia poesia als examens finals da 1839. Cun sias strofas descriva el co ina spada vegn fatga ed el conta in laud al «dir itschal» ed alla «bratscha heroica». Mo la spada astga vegnir duvrada mo en basegns ed alzada mo per il bien: «Ewig sei's des Schweizers Wehre, nur für Freiheit, Recht und Ehre.»<sup>11</sup> Ord la poesia resplenda forza giuvenila ed entusiassem romantic ton pli ferm, essend che Placi Condrau disponeva mo d'ina sanadad falombra.

Buca mo Schwarz, il professor da tudestg e historia, era *Peter Kaiser*, che deva latin e grec, ha giu gronda influenza. Quel derivava da Mauren/Liechtenstein e veva studigiau a Vienna ed a Friburg (Br.) e dociu ad Aarau e disponeva da considerablas enconuschientschas els lungatgs vegls ed ella historia. La pedagogica da Pestalozzi veva influenzau el ferm, mo las scartiras digl uestg Sailer vevan menau el dil sclariment alla romantica, dil liberalissem religios alla religiosadad activa.<sup>12</sup> La posiziun pedagogica da Kaiser ha aviert a Placi Condrau novas perspectivas. Per quest siu magister ha el era prest giu tratg sia spada. La caschun era la suandon-ta: Ils professers Schwarz, Gruber e Hailer levan instradar sil tscheiver 1838 in sault cun las feglias dalla tiara, al qual il decan, pader Adalbert Baselgia ed il rector Kaiser ein s'oponi. Sin quei han ils treis professers irritai pretendiu la demissiun da Kaiser sco rector. Ussa ei Placi Condrau seviults cun 60 scolars al president dil cussegl da scola, Luis de Latour da Breil, per impedir quei. Condrau attestescha, che Kaiser «possedi in zun niebel e pietus patertgar e ch'el seigi in catolic el ver senn e fetschi gnanc in pass senza il cussegl dil reverendissim pietus signur avat.» Ils scolars sincereschan, che «els hagien mai giu ina megliera (instrucziun), pertgei el considerescha las materias dils roms buca ual mo suroravi, sco ei daventi deplorablamein cun far ch'ils scolars vegnien nuota endisai al pater-

<sup>11</sup> Archiv claustral Mustér, *Chronica Monasterii* II, 17—20

<sup>12</sup> Sur da Kaiser ussa *Jahrbuch des historischen Vereins für das F. Liechtenstein* 44 (1944) 5—34 (sur dil politicher), 67—91 sur il historicher, 63 (1964) 1—61 (biografic), 63—132 brevs da Kaiser ad Aluis Latour ord il temps 1838—1842

tgar, mobein sulettamein dressai sco papagagls; anzi el penetrescha profund en quellas e muossa, co tut stetti en in stretg e profund ed admirabel connex incunlauter.» Kaiser fetschi adina attents alla «sabientscha dil scaffider» ed ils scolars giavischien dacormein dad «adina guder ina tala instrucziun». Finalmein han ils scolars tuttina acquistau lur intent e Kaiser ei restaus.<sup>13</sup>

## 2. *Alla universitad da Minca 1840—1842*

Placi Condrau era ussa arrivaus alla suprema classa dil gimnasi a Mustér; in cuors filosofic deva ei da lezzas uras aunc buc. El stueva sedecider per ina certa clamada. Pli tard ha el pliras ga raquintau a pader Maurus Carnot, ch'el vevi da pign student e sco ministrant giu il desideri da sez inaga astgar passar agl altar, mo la fleivlezia da sia vusch e la munconza da dun musical hagian rete-niu el da quei pass.<sup>14</sup> Mintga student, empau religius patratga inaga, pli bia ni pli pauc al sacerdozi. Ton pli in giuven aschi ideal sco Condrau era. Mo quei era buca sia vocaziun e perquei ha el stoviu sedecider negativamein. Las raschuns ch'el indicava pli tard, pudeva el haver raquintau cun bucca rienta. Sia vera destinaziun era biaronz da survir alla baselgia sco laic. Quei saveva el far cun sia plema ual aschi bein, gie forsa aunc meglier che cun stola sin scantschala e cun vusch stentorica.

Perinaga era ei siu plan da scaffir alla universitad ina basa aschi lada sco pusseivel per siu futur operar. Leutier ha el elegiu Minca, nua che Duitg I, retg da Baviera (1824—48), haveva translocau l'universitad bavaresa igl onn 1827 naven da Landshut. L'Alma Mater Bavariae ei sesvilupada allas rivs dalla Isar dètg pulit, han ins gie saviu retrer 1840 il bellezza baghetg niev alla via da Duitg (Ludwigstrasse). Il marcau dils Wittelsbachers ei daventaus tras las aspiraziuns e grondas donaziuns dil retg in center dalla romantica. Alla elecziun da Minca veva senza dubi era professor Schwarz contribuü en speciala maniera. Schwarz sez era ad Erlangen sesius

<sup>13</sup> Pli bia arriguard Kaiser da 1838—1842 mira: Jahrbuch des historischen Vereins für das Fürstentum Liechtenstein 63 (1964) 1—6.

<sup>14</sup> M. Carnot, Dus veterans dalla pressa ed olma romontscha. Ischi 18 (1922) 8

giudapeis a *Gotthilf Heinrich Schubert*, in scolar da Herder, ed era s'inflammaus per la scrutaziun naturala romantica e filosofica da quel. La direcziun da Schubert indicheschan duas da sias ovras: la «*Symbolik des Traumes*» (1814) e «*Geschichte der Seele*» (1830). Quei niebel protestant e pietistic-pietus professor ei secolocaus 1827 dad Erlangen a Minca, nua ch'el ha funzionau sco professor dalla historia naturala generala entochen sia demissiun 1853 († 1860).<sup>15</sup> Nus smerviglein perquei buc, sche Condrau ha frequentau las prelecziuns da Schubert a Minca sur l'antropologia e psicologia e lu era la historia naturala generala. Ils correspondents attestats da Schubert (dils 20 d'avrel e dils 5 d'uost 1841) laudan gie la «distinguida diligenza» da siu scolar. Nus astgein perquei constatar ina certa genealogia spirtala che va da Herder tier Schubert e da Schubert tier Schwarz e da leu tier Condrau.

Dasperas frequentava nies student da Mustér las prelecziuns filosoficas e dalla enciclopedia dallas scienziass tier professor M. Thiersch, sco ils attestats dils 2. d'avrel 1841 confirman. Probabel ei quei magister negin auter che *Friedrich Theodor Thiersch* (1784—1860), in renumau filolog ni meglier detg in humanist universal, medemamein in pedagog e buca il davos in inflammau propugnatur dil liber svilup dil stat ed en special dallas universitads.<sup>16</sup> Ella logica e metafisica ha professor *Andreas Erhard* (1790—1846) introduciu nies student, il qual el ha attestau sco «nunstunclenteivels» e «beintalentaus» (attestat dils 11. d'avrel 1841). Erhard, nativ dal Tirol meridional, era autur da plirs cudischs da filosofia ed era da plirs dramas. «Siu fundament filosofic empunescha al realissem ideal da Schelling, che vegn, buca senza encual electicissem, unius cun sentiment cun ideas religiusas.»<sup>17</sup> Schelling era gie il filosof menond dalla romantica. Era cheu meinan ils fils puspei anavos tier professor Schwarz, che ha udiu ad Erlangen Schelling sez e che ha sia veta mussau bia simpatia per quei filosof protestant, mo senza surprender senza critica las variontas teorias da siu magister.<sup>18</sup> Pia era cheu savein nus constatar ina sort da genealogia spirtala: Con-

<sup>15</sup> Allgemeine deutsche Biographie 32 (1891) 631—635

<sup>16</sup> Sur Thiersch Allg. Deutsche Biographie 38 (1894) 7—17

<sup>17</sup> Sur Erhard Allg. Deutsche Biographie 7 (1877) 196—197

<sup>18</sup> Surlunder Zeitschrift für Schweizerische Geschichte 25 (1945) 68



drau ha empriu tier Schwarz las ideas da Schelling, las qualas el ha danovamein udiu a Minca tier Erhard.

Essend che Condrau valeva suenter igl empren onn generalmein sco «candidat dalla filologia» sco divers attestats muossan, vegn el era ad esser sedaus ora sco tal. Facticamein tschessan ils studis dallas scienziass naturalas. Il secund onn a Minca teidla el mo pli fisica e chemia generala tier prof. *Taddeus Siber*, che accentuescha la diligenza ed il progress da siu scolar sco «distingui» (10 d'avrel resp. 1. uost 1842). Prof. Siber (1774—1854) era in benedictin da Scheyern e podà, che Condrau, il scolar dalla claustra benedictina da Mustér, ha giu simpatia per el.<sup>19</sup> Dil tut ha Condrau era buca bandunau igl intschess filosofic. El frequentava las prelecziuns da filosofia e da religiun dad *Ignaz Döllinger* (1799—1890), in fetg impurtont scienziat dalla historia ecclesiastica. Quei zun erudit scrutatur ei era sefitschentauss dalla veta publica eminentamein, ha el gie encuretge ensemen cun Görres da promover la pressa catolica e las uniuns catolicas.<sup>20</sup> Döllinger ha attestau a siu scolar grischun la diligenta frequenza dallas prelecziuns (attestat dils 29 da fen. 1842).

Al medem tema udevan era ils referats da *Josef Görres*. Sur lunder legin nus il suandont attestat: «Ich Endsunderzeichneter bezeuge hiemit, dass Herr Plazidus Condrau von Disentis aus Graubünden im Sommer-semester des Jahres 1842 sich auf meine Vorlesungen über Philosophie in der alten Geschichte zur rechten Zeit eingeschrieben habe. München, den 2. August 1842 J. Görres.» Dapli udin nus deplorablamein buc.

Josef Görres (1776—1848) era, lu empau sils onns, in zun renomau publicist. 1814 ha el battiu el «Rheinischer Merkur» encunter Napoleon. 1838, dal temps dils embrugls da Cologna, eis el s'opponius cun siu «Athanasius» alla persecuziun della Baselgia en Prussia. Era sco scienziat universal ha el acquistau in num, per ex. cun sia «Mythengeschichte der asiatischen Welt» (1810) en dus toms, e cun ils quater volums «Christliche Mystik» (1836—1842). Dapli che retg DuitgI. ha giu clamau el alla universitad da Minca igl onn 1827, ha el declarau il decuors dalla historia mundiala da sia entschatta entochen al temps present pli bia cun sias ideas e sias visiuns che

<sup>19</sup> Sur Siber Allg. Deutsche Biographie 34 (1892) 134

<sup>20</sup> Sur Döllinger mira Lexikon für Theologie und Kirche 3 (1959) 475

tras l'enconuschientscha dallas cronicas e dils documents. El pli stretg senn era el ni historicher ni filosof, mobein politicher e redacter. Tgei che Görres ha dociu 1842 savein nus buc, essend che sias prelecziuns ein buca publicadas.<sup>21</sup> En scadin cass era el impuls. Ina relaziun persunala cun Görres denton para entochen ussa buca dad esser constatada e tonaton sto Condrau adina haver giu ina certa permanenta regurdientscha a siu magister d'istoria a Minca.<sup>22</sup> Ins po supponer che Condrau saveva che Görres ha giu visitau 1820 la Surselva, ch'el ei staus a Mustér e ch'el ha plidau a Trun cun pader Placi Spescha.<sup>23</sup> Forsa che l'influenza indirecta ei stada per ton pli gronda, sco quei che la distanza ei stada respectusa. Quei che Görres ei staus per la Germania, quei ei Placi Condrau daventaus per la Surselva.<sup>24</sup>

Ferton che Döllinger e Görres han menau il giuven student ellas sublimas sferas dalla filosofia e dalla religiun, han Streber e Hoefler mussau ad el plitost las bellezias dil mund concret e la cuorsa reala dalla historia. *Franz Streber* (1806—1864) era in meriteivel scienziat dalla historia digl art e dalla archeologia. Sco Numismaticher gudeva el renum mundial. El era denton buca el cass da fascinar ses scolars, bein aber da perschader els tras clar e profund argument. Siu serius sentir e patertgar cun la Baselia e siu operar social laschavan daventar el, sco character, simpatics. Tras sia consorta haveva el relaziuns cul cerchel entuorn Görres e Brentano.<sup>25</sup> Tier Streber ha Condrau giu prelecziuns sur estetica (attestat dils 2 d' uost 1482). Cul plaid «estetica» astg'ins denton buca seschar cugliennar, pertgei cun quel era ei buca, ni silmeins buca dil tut manegiau ina introducziun filosofica ella bellezza abstracta, mobein plitost ina introducziun practica alla historia digl art, sco quei ei dil reminent stau il cass tochen en nies tschentaner.

Propi il professor da historia era Hoefler, che deva duas prelecziuns, ina sur dil temps medieval, l'autra sur «istoria pli nova».

<sup>21</sup> Schellberg W., Görres ausgewählte Werke und Briefe 1 (1911) pg. CXIX s.

<sup>22</sup> Igl Ischi 18 (1922) 10 s.

<sup>23</sup> Bündner Monatsblatt 1946 pg. 56

<sup>24</sup> Ins comparegli la dimora a Minca 1844—46 e l'impressiun che Görres ha fatg sin Josef Gmür dad Amden, il publicist da pli tard, sco E. Müller-Büchi ha descret ella en la scartira festiva Oskar Vasella 1964 pg. 571 ss.

<sup>25</sup> Sur Streber mira Allg. Deutsche Biographie 36 (1893) 553 s.

Hoefler ha dau dus attestats a Condrau cun il predicat «cun distincziun» (3 da mars e 8 d'uost 1842) Tgi era bein quei historicher? Karl Constantin Ritter *von Hoefler* (1811—1897) era sez sortius dalla scola historic-romantica da Minca, cun tut che el ha, sco scrutatur, stoviu sedistanziar da Görres e Schelling, mo malgrad gliez ha el tonaton adina preziau lur spert. Siu renum sco medievist ha el fundau cun ses dus volums «Die deutschen Päpste» (1839). Generalmein vegn el descrots sco biala figura, cun anim poetic e da viarva artistica, che fascinava ses scolars. Schegie ch'el patertgava stregn catolicamein, era el nuottatonmeins aviarts per scadin progress. El vala per fundatur dalla metoda compareglionta en ses fatgs da scrutaziun historica ed era sigl ault buca mo cun la historia tudestga e slava, anzi el elaborava era, principalmein pli tard sco professor alla universitad da Prag, temas franzos e spagnols. Luvrond aunc sco vegliuord eis el morts cun prest 87 onns 1897, tschun onns avon la mort da Condrau sez.<sup>26</sup>

Quei che ha distinguu tut quels professers a Minca era lur public operar en favur dalla Baselgia, lur combat per la libertad da quella encunter il stat e lur lavur per acquistar la publica opiniun. Cheu ha la gasetta «Allgemeine Zeitung» giugau ina gronda rolla. Fundada era ella atgnamein gia 1798, mo obteniu siu num ha ella pli tard. All'entschatta eis ella cumparida a Stuttgart (1798), lu ad Ulma (1804) e finalmein ad Augsburg (1810). Per pli tard (1882) ha Minca surpriu l'ediziun (sistida (1914). Ella promova la direcziun «germana ed austrofila» (grossdeutsche und österreichfreundliche Richtung). Ella ha astgau segloriar, che duront si'existenza, buc in soli prominent scribent tudestg seigi s'abstenius dalla collaboraziun.<sup>27</sup> Essend che quella gasetta vegneva entuorn la mesadad dil tschentaner legida dapertut dils scolai, ei Condrau era vegnius a Minca en contact cun ella. En sia cuorta caratteristica da sesez scretta per romontsch e che sepresenta mudestamein sco in «pro memoria», rauenta el a nus sco suonda: «La schurnalistica ei a mi da giuven ensi in plascher. Cura che jeu sundel vegnius a Minca

<sup>26</sup> Sur Hoefler mira Allg. Deutsche Biographie 50 (1905) 428—433

<sup>27</sup> Sur la Allgemeine Zeitung mira Der Grosse Herder, 4. ed. I (1931) 380 e principalmein W. Bauer, Die öffentliche Meinung in der Weltgeschichte 1930 pg. 262—263, 333, 352

igl onn 1840, hai jeu entschiet a leger regularmein la «Augsburger Allgemeine Zeitung» ed hai continuau cun quella lectura entochen al Concil Vatican. Mo pervia dallas odiusas «brevs romanas da Döllinger» hai jeu calau da leger quella Gasetta». (p.1). Igl emprem ei compariu gia dapli 1867 correspondenzas anonimas da Döllinger ella «Allgemeine Zeitung», che han leventau purla e lu specialmein ils artechels dil mars 1869 sur dil concil. Dils 17 da december 1869 naven suondan las brevs romanas dil Concil, che tradeschan plitost il lungatg d'in beffegiauner che d'in teolog.<sup>28</sup> Per tala litteratura veva Condrau ni raps en sac ni plaz sin cruna da cudischs. E lu ha bein era la scumiada digl onn envidau el da visar giu la gasetta, ensesez preziosa, mo ussa disviada. Quei fatg sclarescha il character da Condrau sco buc in auter. «Non jurare in verba magistri» po el ver detg.

### 3. *Alla universitad da Bonn 1842/43*

Condrau leva emprender d'enconuscher il grond mund dalla scienza e dil spert buca mo ella capitala bavaresa, mobein era ella Tiaratudestga dil Rein a *Bonn*. Cheu veva il retg dalla Prussia, Fresch Guglielm III., eregiu 1818 danovamein la universitad vivon sistida, che possedeve, conform las relaziuns dalla tiara ton ina facultad catolica sco ina evangelica e che veva cheutras in character confessionalmeyn mischedau. En quella «Königlich Preussische Rheinische Friedrich-Wilhelms Universität zu Bonn» ei il giuven student da Mustér entraus per absolver il semester d'unviern 1842/43 e quel da stad 1843.

La Alma Mater dalla Renania ha da lezzas uras giu da biaras difficultads. Denter Bonn e Berlin regeva ina tensiun. L'universitad era vegnida eregida tras favur roiala, mo professers e students preferivan per la plipart il niev spert democratic. Cun quei spert mava ei buca bein a prau, cura ch'il ministeri roial pladeva professers senza salidar las facultads. La secunda tensiun regeva denter Bonn e Ruma. Ei setractava dallas ductrinas ch'il teolog e filosof Georg Hermes, che ei staus professor a Bonn da 1820 tochen sia

<sup>28</sup> E. Michael, Ignaz von Döllinger 1894, pg. 65—111

mort 1831, haveva dociu. Igl ei vegniu ad ina aspra lutga denter Hermesians e lur adversaris. Gregori XVI. ha sentenziau 1835 e 1836 il sistem Hermesian e principalmein perquei che quel ha buca declarau il dubi metodic, bein aber igl absolut e positiv sco pugn da sortida dalla scienza teologica. Oravontut haveva igl arzuestg da Cologna Clemens August von Droste-Vischering (1835—1846) gidau a terrar il Hermesianissem cun siu decidiu proceder. Quei prenci dalla Baselia ei da sia vart l'otra ga vegnius en carplina cun Berlin, cunquei che el era seviults encunter la practica prussiana en la domanda dallas lètgs mischedadas. Perquei eis el vegnius transportaus ils 11 da november 1837 en la fortezia da Minden. Da lezzas uras scriva Görres ual siu renomau «Athanasius» (1838), el qual el pretendeva per la Baselia «Las libertads da 1789». Per igl onn 1841 han ins fatg pasch, essend ch'il niev retg, Fresch Guglielm IV. (1840—61), leva buca stuschar naven ils Renans.<sup>29</sup>

Quellas tensiuns vibravan aunc empau igl onn 1842, pia il temps che Condrau ei serendius alla universitad renana. Quei observein nus cuninaga vid la persuna da siu professor principal, *Josef Aschbach* (1801—1882), in fervent catolic da Nassau. Quel era vegnius pladius alla universitad senza consentiment dalla facultad dil ministeri roial e perquei greva gia lu in cert E. M. Arndt: «Ils gesuits ein puspei cheu.» Aschbach era in historicher da consideraziun e veva gia pli baul exponiu en pliras ovras (1827—1837) il mund arabic-visigotian, tras impuls da Friderich Christoph Schlosser, e che ei lu era tras Johann Friedrich Böhmer vegnius endridaus alla historia digl imperi tard-medieval (Historia digl imperatur Sigmund. 4 toms 1838—45). Sias prelecziuns eran conscienziusas e solidas, denton era senza slontsch e fantasia.<sup>30</sup> Condrau ha udiu tier el sur il temps medieval, sur da «deutsche National-Herzogtümer» e sur dalla historia dil pievel e dil reginavel tudestg en general. En scadin cass capeva Aschbach dad intermediar a ses discipels capientscha e carezia pil temps medieval. Con fetg Condrau carezava siu magister seresulta ord il fatg, ch'el ei buca senuspius dad acquistar il lexicon

<sup>29</sup> Friedrich von Bezold, *Geschichte der Rheinischen Friedrich-Wilhelms-Universität von der Gründung bis 1870*. 1920 pg. 173 s., 323 ss. J. Schmidlin, *Papstgeschichte der neuesten Zeit* 1 (1933) 567—584

<sup>30</sup> Sur Aschbach mira Bezold pg. 395—396, 463. *Deutsche Biographie* 46 (1902) 59—68

ecclesiastic d'Aschbach en quater toms. (Allgemeines Kirchenlexikon. 1846—50). En sia biblioteca secatta era la historia mundiala da Schlosser en 19 volums (1844—57), ina ovra che indichescha puspei la mediaziun dad Aschbach. Con fetg Aschbach e Condrau eran uni in cun l'auter muossa era la caulda recumandaziun dil professor da Bonn alla regenza grischuna, cura ch'ei settractava d'encurir in magister da historia per Cuera (24. fen. 1843). Fuss Condrau aunc staus 1844 a Bonn, vess el stoviu sevilentar pervia dalla dispeta sur dalla realitad dil s. vestgiu da Trier e sur dil pelegrinadi a Trier, ha quella schizun mess malperina ils professers da Bonn. Capeivel che Aschbach ei 1853 seviults encunter Vienna.

En in cert senn era professor *Johann Wilhelm Löbell* (1786—1863) per aschidedir ina cunterpeisa ed ina cumpletaziun dil mo memia mudest Aschbach. Quel era da Berlin e zun profundaus ella antica. «Aunc menava lu la via regulara dil historicher sur la Grecia e Ruma en las regiuns dalla historia medievals e nova». El denton ei vegnius 1829 sco «nundisputabel giuvnal dalla romantica» a Bonn, en relaziuns amicablas cun Tieck e Daumer; era el parteva la predilecziun da quels per studis litteraric-historics. Mo «igl uerbel veglprussian e protestant» era buca in stravagau admiratur dil temps medieval. Con criticamein che quel empruava da tschaffar las fontaunas, muossa sia ovra edida 1839 sur Gregori da Tours e siu temps, che ha fatg el enconuschents tiels scenziats. Sia inclinaziun alla historia universalas, sia representaziun patetica e siu colorit bellettristic plascheva buca a tuts, mo ha tuttina segirau ad el in ventireivel success. Il contact ch'el encureva culs students ordeifer ils collegis ha bein era gidau leutier. Segiramein buca ina persunalitad eminenta, mo tuttina ina persunalitad.<sup>31</sup> Condrau ha udiu tier Löbell lecziuns sur Alexander il Grond e ses successurs, lu sur la historia dalla nova litteratura tudestga naziunala ed era sur la historia europeica dapli 1815.

Condrau frequentava era las lecziuns da prof. *Friedrich Christoph Dahlmann* (1785—1860), che era atgnamein in subdit svedès e che doceva historia a Kiel ed a Göttingen. Sia «Geschichte Dänemarks» (1835 s.) ha fatg el sco historicher enconuschents avon ch'el

---

<sup>31</sup> Sur Loebell mira Bezold 257—258, 393, 433, 455, 502, e Allgemeine Deutsche Biographie 19 (1884) 35—38

vegna 1842 a Bonn, nua ch'el ha operau sco docent da historia tu-destga e da scienza statale. Mo el era plitost politicher che historicher ed in perschuadiu combattant per dretg e giustia e che haveva senn per tut grond e verdeivel, igl ideal german original, buca il davos pervia da sia statura gigantica, ual aschia sco Fichte haveva predesignau el inaga. A Dahlmann valevan «Luther e Stein sco ils vers heroxs dalla historia tu-destga.» Leutier era el denton tuttavia buca infectaus dil spert d'opposiziun da Rotteck ni dal radicalissem dils giuven-hegelians, mobein in democrat moderau che intendeva alla monarchia costituzionala . . . . Condrau apprezzava quei historicher politic, che era ual arrivaus a Bonn e steva al cenit da sia autoritad. El ha frequentau sias prelecziuns sur la historia englesa dil 16. e 17. tschentaner duront il semester da stad 1843. Prest sissu, igl onn 1844, ha Dahlmann ediu sia «Geschichte der englischen Revolution». Il professor tu-destg veseva ella Engheltiara ils exempels giavischabels ed imitabels d'ina libra costituziun parlamentara. Forsa ei Condrau era vegnius influenzaus u rinforzaus da Dahlmann en sias ideas democraticas.

Professor *Georg Benjamin Mendelsohn* (nasch. 1794) era medema-mein preoccupaus per l'Engheltiara. El era in beadi dil filosof ed in frar dil musicher Mendelsohn ed ei vegnius engaschus 1828 a Bonn, suenter ch'el ei staus enconuschius sco commember dalla Baselia evangelica. Il zun talentau um era plitost historicher en fatgs da costituziuns, ed in politicher social conservativ, che geograf e statisticher. Igl onn avon, duront il semester da stad 1841, ha Mendelsohn pudiu interessar il giuven Jacob Burckhardt per historia englesa, industria ed economia.<sup>32</sup> Condrau ha udiu duront il semester d'unviern 1842/43 «Europäisches Staatssystem» e quei, sco ei secloma egl attestat final «mit sehr ausgezeichnetem und unausgesetztem Fleisse». Sche ei era aschia, lu astgein nus concluder, ch'il professor, che era schiglioc bia pli bugen sin siu bein renan u sin viadis, hagi teniu fideivlamein sias prelecziuns.

Nies student da Mustér leva denton buca restar mo tier la politica. Sco retoromontsch stueva el era haver simpatia per ils referats

<sup>32</sup> Sur Dahlmann mira Bezold, pg. 354—359, 422. Allgemeine Deutsche Biographie 4 (1876) 693—699

<sup>33</sup> Bezold 399—400. W. Kaegi, Jakob Burckhardt 2 (1950) 140—142

da *Christian Friedrich Diez* (1794—1876). Göthe haveva inaga giu fatg attents il giuven Diez sin il lungatg provenzal e sia litteratura. Dapli che el ei lu daventaus lectur dils lungatgs novs a Bonn, eis el daventaus igl agen fundatur da la filologia neolatina. Ual haveva el ediu ina «Grammatik der romanischen Sprachen» (1836—42) en treis toms. Diez denton uneva la arcibia dil filolog cun la fantasia creativa dil litterat e perquei ha el capiu aschi bein, da far enconuschents ils gronds dalla litteratura neolatina.<sup>34</sup> Condrau frequentava da lezzas uras la stad 1843 il colleg sur igl Inferno da Dante. Diez, che veva mai in pli grond diember dad auditurs, vegn ad esser selegraus dagl interessau student. Schebein Condrau sesanflava denter ils paucs, che ein vegni pli datier al schenau e malsegideivel Professor? Tgisà schebein omisdus han giu discurreu dil romontsch? Diez ha buca dumbrau il romontsch denter las soras independentas neolatinas, sco il provenzal ed italian, mo ha pli tard enconuschiu sia impurtonza lingustica.<sup>35</sup>

Denter ils professors da Condrau figurescha era *Johann Friedrich Delbrück* da Magdeburg (1772—1848), che era vegnius a Bonn gia cun l'erecziun dalla universitad 1818 e che deva «biala litteratura» e «filosofia». Dal temps che Condrau studegiava a Bonn, era Delbrück gia in um vegl, che veva publicau da bia scartiram per ex. sur Socrates e Xenophon, sur christianissem e davart educaziun. Mo a sias ovras muncava il cuntegn scientific, essend che el era atgnamein bein strusch in filosof. El leva instruir la giuventetgna academica cun mussar ad ella, «dass jede unbefugte Kritik an den Handlungen der Regierung und an den staatlichen Zuständen ein Greuel sei». Buca per nuot manteneva el relaziuns amicablas cun la famiglia roiala. «Seine edle Natur war stets auf das höchste Pathos eingestellt, entbehrte aber jedes Humors». Cun quei ch'el demussava era capientscha per ils catolics, po el era haver captivau empau il Condrau.<sup>36</sup> Quel ha udiu duront il semester da stad 1843 las prelecziuns da pedagogica. Delbrück scriva ad el egl attestat final: «Ohne

<sup>34</sup> Sur Diez mira Bezold, 251—253. Allg. Deutsche Biographie 5 (1877) 214—217

<sup>35</sup> A. Decurtins, Das Rätoromanische und die Sprachforschung. Vox Romanica 23 (1955) 283—284, medemamein Annalas da la Società Retoromontscha 77 (1964) 54—55

<sup>36</sup> Sur Delbrück mira Bezold 188—189, 227—228, 382—383, Allg. Deutsche Biographie 5 (1877) 36—37



Unterbrechung regelmässig und mit stets bewiesener eifriger Theilnahme an den Unterredungen». Igl interess pedagogig ha accumulau Condrau atras sia entira veta. In cert patos pedagogig, ch' ins observa buca mo tier Delbrück, mobein era tier Löbell e Dahlmann ed in summa aunc tier biars professors da lezzas uras, ei restaus era a nies Grischun.

Propria filosofia ha Condrau udiu duront il semester da stad 1843 tier prof. *Ferdinand Walter* (1794—1879) sur il dretg natural. Walter era gia dapli 1819 professor a Bonn ed instrueva en tuttas direcziuns dil dretg, las pandectas ed il dretg civil franzos, il dretg ecclesiastic ed il dretg natural, ed ha era ediu cudischs d'instrucziun, che han fatg el enconuschents lunsch entuorn. El possedeua in grond dun d'instruir ed era ina comparsa tuttava attractiva. Primarmein empau infectaus dal gallicanissem, eis el vegnius pli e pli catolics sco gia sia posiziun ella dispeta hermesiana demuossa.<sup>37</sup>

Condrau s'interessava era per la scienza naturala. Aschia ha el frequentau il *F.W. Radicke* da Berlin (1810—1883) sur la teoria dil quintar, algebra, la «Analysis des Endlichen», trigonometria e finalmein sur da maschinas da vapur. Schegie che Radicke possedeua atgnamein buca in bien dun comunicativ, ha el dau a siu discipel igl attestat: «Unausgesetzt und mit der löblichsten Aufmerksamkeit».<sup>38</sup> Tier la scienza naturala udeva da gliez temps era metereologia, che Condrau ha udiu tier *F. Chr. von Riese*<sup>39</sup>. Al dun litterar da Condrau vegnan forsa ils roms linguistics, filosofics e historics ad haver corrispundiu meglier. Mo nies Grischun vuleva guder ina instrucziun aschi generala sco pusseivel, sco quei che tala valeva lu en general sco ideal. Leutier fuvan pia era quellas enconuschentschas praticas nizeivlas. Buca per nuot ha el ediu 1859 ina introducziun el quintar practic per mistergners, marcadonts ed administraturs (Contabilitad ne intruidament co manar ils quens. Mustér, Condrau 1859, 119 p.)

Malgrad ils interessants studis e la liunga distanza ha il giuven Condrau adina manteniù bien contact cun sia famiglia. Ella brev dils 19 da fevrer 1843 admonescha il bab el da far progress ella

<sup>37</sup> Bezold 196—197, 328—331, Allg. Deutsche Biographie 41 (1896) 22—24

<sup>38</sup> Bezold 401. Allg. Deutsche Biographie 27 (1888) 135

<sup>39</sup> Bezold 310

scienza ed en conduita, sinaquei ch'el daventi ventireivels en questa ed en l'otra veta. Placi ha conservau la brev sco in testament spirtal (brev da miu car bab cun bialas admoniziuns). Il bab Gion Fidel scriva era, che ils paders damondien adina suenter el e laschien salidar. La scola claustrala, che dumbri trenta scolars, hagi fatg ina excursiun en Tujetsch «con la Fahne pintgia», che resti probabel a Mustér. (Fidel Condrau al feagl, 19. fevrer 1843).

Sco Placi sez confessa, viveva el a Bonn «leds e cuntents» e sia dimora alla universitad spel Rein vegneva «adina pli amureivla», ch'el ha survegniu las novas che siu bab seigi grev malsauns. Quei patratg persecitava el «dapertut sco sperts admonents». Leutier ei aunc vegniu la mort d'in auter enconuscent, probabel dil mistral Nicolaus Josef F. Cabernard, ch'ei morts ils 3 d'avrel 1843 anetgamein mo da 36 onns (Glogn 1944 pg. 108). Surlunder scriva Placi a siu bab: «Il pauper Bundesstatthalter ha stoviu bandunar quest mund ella flur da sia veta! Cun el han biars piars in bien amitg e la patria in nizeivel burgheis. Enzatgei aschia havess jeu veramein buca spitgau, cura che jeu hai priu comiau dad el. Ussa aber capeschel jeu ils plaids verdeivels: La mort vegn sco in lader da notg. Sch'ins survegn talas novas da Hiob, sa mo la religiun pli tener ins sidretg ed a tgi che quest niebel dun celestial maunca, lez vegn tentaus da prender las pli terriblas mesiras». (Placi a siu bab, Bonn 12. zercl. 1843). Aunc il medem onn ei il bab da nies student a Bonn morts, treis jamnas suenter la davosa brev dil marcau universitar a Mustér. Plevon pader Beat Ludescher ha provediu il moribund, spartius igl 1. d'uost 1843 en consequenza d'ina malsogna interna (inflammatio viscerum) mo cun 58 onns. El ei satraus ils 3 d'uost el santeri da S. Gions. (cud. da mortoris). Per il feagl po quei esser stau ina enzenna da finir ses studis e dad encurir ussa sez la via tras la veta.

#### 4. *Professor alla scola cantunala catolica a Cuera 1843—1850*

Dapli igl atun 1842 haveva la scola cantunala catolica bandunau Mustér ed era secolocada a S. Leci a Cuera. Cheu ha ella denton entschiet sut l'enzenna da stemprau. Il cussegl da scola vuleva mantener vinavon Peter Kaiser sco rector; sco tal veva quel era funcziunau a Mustér. Cheuencunter ha il delegau episcopal protestau, gie

schizun renviau quel sco professor. Il cussegl da scola denton ha cedi mo ella damonda da rectorat ed ha manteniu Kaiser vinavon sco professor. Recter ei Edmund Klinkhardt (1842—48) vegnius numnaus e sunter la mort da quel ei Peter Kaiser tuttina aunc in gada vegnius recter (1848—50).<sup>40</sup>

Gia la primavera 1843 ha il bab Fidel Condrau fatg attents siu fegl sin la pusseivladad dad obtener a Cuera ina piazza da professor. Per quei intent ha il bab era cussegliu da studigiar empau pedagogica e dad insumma sepreparar sin quella clamada. A Cuera sesanfli gie era Peter Kaiser, mo hagi el era leu puspei anflau ses adversaris (con la solita opposiziun). Mo dubitava il bab Condrau sez, che Klinkhardt seigi d'engrau a Cuera. (Fidel Condrau a Placi, Mustér, 19. de fevrer 1843). La scola cantunala catolica a Mustér era vegnida discreditada sco irreligiusa e nunecclesiastica da Cuera anora ed entras la Gasetta ecclesiastica a Lucern (Schw. Kirchenzeitung). Aschia eran tuts ils magisters a Mustér vegni suspectai. Ei setracta cheu da pareris e pregiudecis tut en general e purtai entuorn mo memia pauschalmein. Per contonscher ina piazza ella capitala grischuna, oravontut ina professura da historia, ha il giuven student da Bonn perinaga schau dar in attestat da siu magister principal, professor Aschbach. En quei attestat accentuescha Aschbach la premura e diligenza, cun la quala Condrau hagi persequitau sias lecziuns sur dil temps medieval e historia tudestga. El seigi sededicaus al studi historic cun «dètg bien success,» da maniera che el sappi recumandar cauldamein il candidat per in rom historic en in gimnasi. (Bonn, 24. fen. 1843). Ina secunda recumandaziun ha Condrau procurau dal recter Klinkhardt a Cuera, che veva aunc dau a Condrau 1838—1840 matematica e fisica a Mustér. Klinkhardt accentuescha, che Condrau hagi, secund tuts ils attests da 1837—1840, acquistau ina scolaziun generala. Il recter suttastreha cunzun las enconuschientschas en historia e geografia ed attestescha era, che il candidat hagi acquistau a Mustér l'affecziun ed il respect dils magisters e dils conscolars (Cuera, 13. sett. 1843).

Condrau ei segiramein alla entschatta, sco student dalla scola cantunala catolica a Mustér e pli tard sco student allas universitads tu-

---

<sup>40</sup> Mira J. Michel, 150 Jahre Bündner Kantonsschule 1954, pg. 92 s.

destgas, vegnius signaus cun ina enzenna da damonda els cerchels dil canzelier episcopal Riesch. La Gasetta «Schweizerische Kirchenzeitung» digl 1. da schaner 1842 marmugna gie sur da sia dimora el marcau liberal da Minca da tala maniera: «Ein braver junger Mann von gut katholischen Grundsätzen studiert auf der obskuren, d.h. katholischen Universität München und wird daher höchst wahrscheinlich bei manchem nicht gut angesehen sein.» Mo cura che las undas ein empau stadas sequietadas a Cuera e stat e baselgia ein empau seavischinai, ha la medema gasetta ecclesiastica scret igl atun digl onn suandont 1843, che Condrau seigi per la professura da historia: «ein wohl noch nicht genug erfahrener Mann, der aber, wie man von achtbarer Seite hört, voll wissenschaftlichen Eifers und von katholischen Grundsätzen ist.» (Schw. Kirchenzeitung 1843, pg. 676). Essend che Condrau era in energic defensur da Kaiser, eis era el vegnius empau en suspects, schegie senza la minima raschun.

Condrau ei pia staus professor da historia, geografia ed aritmetica a Cuera da 1843 tochen 1850. Nus astgein supponer, ch'el seigi s'impundius a siu uffeci cun tgierp ed olma. Sia biblioteca tradescha a nus ils auturs, che el duvrava il bia en historia. Oravontut prefereva el ils historiografs dalla romantica. Aschia preziava e citava el savens *Johannes von Müller* (1759—1809). Las «ovras entiras» da quel, 40 volums 1831—1835, ha Georg Müller ediu. La pragmatica da quei autur da Schaffusa plascheva par'ei a Condrau, cuntut ch'el saveva buca snegar la urdadira aristocratica da quella ovra. Essend che nus essan tuttina alla biblioteca da Condrau, croda aunc ina ovra historiografica dalla romantica da provegnientscha conservativa ad egl, numnadamein igl italian *Cesare Cantù* (1807—1865). Sia ovra «Allgemeine Geschichte», elaborada per tudestg da Brühl en 12 toms, ei denton comparida per 1849—1865. Mo forsa aunc dapli che ord quels cudischs ha Condrau empriu ord sia observaziun dil temps ed ord la viva tradiziun.

Ella capitala Grischuna ei nies giuven professor era sefitschentaus dasper sia professura cun la schurnalistica. Cert ei Condrau buca il fundatur dalla Gasetta en Surselva, pertgei dapli 1836 existeva gia il «Grischun Romonsch», secrets el senn liberal dils Latours. Dapli 1838 compara denton era il fegl pli conservativ «Amitg della Religiun e della Patria». Cun quella direcziun ha «Il Romonsch» continuau dapli 1845, tochen 1848. Els combats per la constituziun

da 1847/48 ha el manteniù in tun ruasseivel ed ina posiziun intermedionta. Il successur dil «Romonsch» ei dapli 1849 igl «Amitg dil Pievel», che ei compariù sut la responsablada dil stampadur Benedikt Holdenried.<sup>41</sup> Sco nus vein viu, veva Condrau gia documentau interess per la schurnalistica ils onns da Minca. A Cuera crescha quel pli che mai. En sia «Pro memoria», ina sort autobiografia, screta per romontsch, di el expressivamein: «Sco professor della scola cantonala catolica a Cuera sun jeu separticipaus alla schurnalistica romontscha e redigiù leu il davos Amitg dil Pievel, che compara ella stamperia episcopala nel Holdenried» (p. 1) Facticamein sesanfla igl Amitg dil Pievel dils 23 da schaner 1850 tochen ils 21 da november 1851 egl archiv Condrau. Sin Nr. 4 dils 23 da schaner 1850 ha Pl. Condrau scret cun agen maun: «Redactur tochen gl'uoost Pl. Condrau». Suenter 1850 ha el buca giu peda pli da luvrar per las Gasettas, sco el sez di en sia «Pro Memoria.» Cun quests plaids s'expressa el ton general, ch'ins astga sminar, ch'el hagi pli baul aunc diregiù ina outra gasetta. En mintga cass secattan egl archiv Condrau aunc las annadas 1847 e 1848 dil «Romonsch» cun la remarca manuscreta: «redactur Pl. Condrau». Quei para dad esser dapli che mo indicaziun dil possessur. Ultra da quei va ual la posiziun, che quella Gasetta ha priu en dil temps dalla uiara separatista (Sonderbund) e dalla costituziun da 1848, bein a prau cun las ideas da Condrau, che patertgava conservativ, mo era adina scaldaus per instituziuns democraticas.

La schurnalistica para atgnamein dad haver mussau la via a Condrau siaden Surselva, nua ch'il territori linguistic romontsch era aunc nunsmasaus. Forsa ha era il clima dalla patria tratg el anenasi. Pervia da sia falombrada vegneva el numnadamein consideraus empau per in candidat dalla mort. Sco ins raquenta duess el ual per quei onns en ed onns ora buca haver cumprau in manti niev, remarcond ch'el vivi tuttina buca ditg. La raschun principala ch'el ei ius naven da Cuera era tut ina outra. Malgrad las protestas da vart

<sup>41</sup> J. Candrea, Die romanische und italienische Journalistik Graubündens, en Die Schweizer Presse 1896 pg. 471—489. Quella lavur fundamentala continuescha Gadola Guglielm cun siu studi: Historia dalla schurnalistica sursilvana 1836—1928. Mustér Condrau 1928, 192 paginas. (separat ord igl Ischi 21) Ina cuorta survesta da Chr. Caduff sesanfla en las Annalas 77 (1964) 105 — 129

catolica ei igl onn 1850 la scola catolica cantunala vegnida unida cun la reformada.<sup>42</sup> Quei considerava el per ina provoconta violenza e perquei ha el bandunau quei Cuera malmaneivel.

##### 5. *Professer alla scola episcopala a Mustér 1850—1856*

Sco acziun encunter la reuniun dallas duas scolas cantunalas ha igl uestg Carli de Carl de Hohenbalken fundau la schinumnada scola episcopala a Mustér, che dueva el medem temps valer sco seminari pign e manar vinavon la scola cantunala catolica. Condrau era persesez cuninaga scaldaus per l'idea. Essend ch'el habitava a Cuera si Cuort, era el buca vegnius elegius sco commember dil magistrat dalla Cadi, che veva beneventau unanimamein il plan en sia radunanza decisiva dils 9 d'avrel 1850, secapescha culla speranza sigl agid digl uestg e dalla claustra. Quei fatg prendeva ins per in avantatg per la Cadi e per la giuventetgna catolica dil Cantun insumma. Ils iniziants savevan bein avunda, ch'ei vegni cheutras spargnau al cantun da bia expensas. Il magistrat ha cuninaga elegiu ina commissiun speciala, consistenta ord il mistral regent, dr. Augustin Condrau, in frar da Placi, Domenico Ferrari da Trun e Benedetg de Castelberg. Quei triumvirat dueva contrahar cun la claustra e cun igl uestg ed envidar ils ulteriurs cumins catolics alla partecipaziun. Era dueva el mirar da secunvegnir cun prof. Condrau.<sup>43</sup>

Ils 17 d'avrel 1850 han ins suttascret il contract denter la claustra e la Cadi. Ils 11 da fenadur ha il magistrat elegiu il *cussegl da scola*, cun Placi Condrau alla testa. Ulteriurs commembers eran dr. med. Placi Berther da Mustér e vegl mistral Gion Batt. Cagienard da Rabiis.<sup>44</sup> Era igl uestg da Cuera ha entras siu cancellier Casanova approbau il niev president da scola, buca senza accentuar il medem temps la premura per la religiun e la integritad morala da quel. (archiv Condrau). Cura ch'il redacter Ott dalla «Churer Zeitung»

<sup>42</sup> J. Bazzigher, *Geschichte der Kantonsschule 1904*, pg. 204. Michel 1. c. 93 s.

<sup>43</sup> Archiv Condrau, Statthalter en uffeci Castelberg a Pl. Condrau ils 11. d'avrel 1850

<sup>44</sup> Ina historia detagliada sur la scola episcopala a Mustér vegn aunc a comparer. Cheu setracta ei sulet da retener quei che appartegn la caratteristica da Prof. Condrau.

ha giu reproschau igl atun dil medem onn, che Condrau hagi luvrau per quella scola ord interess da famiglia, ha igl attacau saviu constatar, ch'el hagi luvrau per quei intent, pér cura ch'el hagi viu a vegnend la fin dalla scola a Cuera. El hagi era saviu sefundar sin persunalitads ord autras valladas, che hagian confirmau, che «sut las presentas circumstanziass sappi ina scola flurir negliu meglier che a Mustér. Ils temps semidien e duessi semussar, che nossa scola catolica stetti meglier ella Foppa u a Vazerol ni a Cuera, sche vegn jeu bugen ad accordar a quella translocaziun». Mo Condrau ha gia lu saviu argumentar: «Ei seresulta ord la frequenza da nossa scola, ch'il pievel catolic schenghegia bia fidonza a Mustér e nus lein sespruar dad esser vengonz da quella».<sup>45</sup> Cuort suenter han ins saviu aggiunscher per la defensiun dil president da scola, ch'el hagi susteniu finanziamein enzaconts students alla scola catolica a Cuera e ch'el hagi schau trer giu mintg'onn 130 flurins da sia atgna paga, per aschia mantener la scola.<sup>46</sup>

Condrau era buca mo president da scola, el deva era sez scola. Sco ins vesa ord il rapport annual da 1852/53, instrueva el ellas classas inferiuras aritmetica, geografia, historia naturala e cuors da menar quen. Pli fetg aunc para el d'esser s'occupaus cun la historia, bein en tuttas classas. Co el leva haver capiu la scienza dalla Clio, di el sez el rapport annual: «Ei vegn buca tendiu suletamein ad ina enconuschientscha cumpletta e fundamentala dalla historia, mobein era mirau che la historia veglia e nova stetti en connex cun la veta e cun la historia ecclesiastica e che Cristus stetti el center da tuts temps e da tuts pievels. L'instrucziun els lungatgs classics vegn per quei consideraus sco mied subsidiar, historia ecclesiastica e historia litterara sco part integrala dalla historia mundiala.» Ina concepziun pli ideala dalla historia e dil cristianissem dat ei bein strusch. Cheu semuossa Condrau sco scolar da la romantica el bien senn. Dasperas deva el era pedagogica, buca mo referend, mobein era excercitond practicamein cun ses scolars. La scola claustrala era el medem temps era seminari scolastic, ils candidats eran ton sco pusseivel ellas classas realas. Condrau sez ha menau, ensemen cun auters in

<sup>45</sup> Amitg dil Pievel dils 27 da nov. 1850

<sup>46</sup> Amitg dil Pievel dils 6 da december 1850. En quest liug vegn era remarcau, che Condrau hagi dau 500 fl. per la scola rurala dalla vischnaunca da Mustér.

cuors romontsch per scolasts, ils quals «per munconza dil lungatg tudestg han buca saviu far il cuors a Cuera». Cheu semuossa igl ideal da Condrau da promover la scola rurala en Surselva. Gia da gliez temps era el inspecter da scola dil district Reinanteriur. Quella activitad suletta meritass gia in agen studi.<sup>47</sup>

Essend che la scola ei gia igl empren onn vegnida en empau difficultads entras il disdir dil rector Friedrich Bäder, haveva Condrau alla biala entschatta empau disgusts. Quei vesan ins ord siu plaid final digl onn scolar 1850/51. Buca per nuot admonescha el alla fin «eines so verhängnissvollen Schuljahres», da drizzar la eglia da ensiviars e da buca emblidar, che «tgi che sefida da Diu baghegia sin ferm fundament». Lu citescha el il plaid d'in franzos: «En in garnetsch cardientscha schai pli bia forza che en in cuolm da dubis ed indifferentissem». Condrau lauda igl uestg sco veramein liberal e generus um, che mantegni la scola cun sias unfrendas finanzialas. Era engrazia el alla claustra per la amicabla recepziun: «Pli che jeu sfegliel ellas annalas reticas, e pli jeu enconuschel la eminenta impurtonza, il bi pensum da questa casa. Ad ella han ils avdonts dil Reinanteriur d'engraziar ils pli custeivels beins ch'els possedan.» La claustra seigi sco ina glisch, avon la quala la stgiradetgna seigi svanida. Ella seigi stada aunc dapli, ella seigi stada seminari d'instrucziun e cultura. Condrau raquenta buca mo da Sigisbert ed Ursicin e da Tello, mobein era dagl uestg Adalgott, dalla emprema uniun dalla claustra cun la flurenta Confederaziun, digl avat Thüring da Attinghausen e dalla fundaziun dalla Ligia Grischa tras avat Pieder da Putnengia, digl avat Johannes Schnagg «che steva alla testa dils caus dalla tiara a Vazerol» e che eri pia in confundatur dalla republica grischuna. Igl avat Christian de Castelberg representa el insumma sco spindrader dalla claustra e dalla Surselva catolica. Senza la claustra fussi la Surselva gie curdada. (archiv Condrau) Quellas ideas sur la impurtonza dalla claustra vegn Condrau adina puspei ad haver purtau denter il pievel, sesanflan ellas gie era el plaid de Casper Decurtins sin cumin 1877 per spindrar la claustra.

Era igl onn suondont sepresentan buca pintgas difficultads, gie ei setractava schizun dalla existenza dalla scola e dalla claustra sez-

<sup>47</sup> Surlunder G. Deplazes, Geschichte der sprachlichen Schulbücher im romanischen Rheingebiet. 1949 pg. 201 (Register sut Condrau Pl.)



za. Igl onn 1852 ha il cantun inventarisau diversas claustras, era quella da Mustér. Inventarisaziun ei per ordinari igl emprem pass per la secularisaziun, sco igl exempel dallas claustras egl Aargau muossa. Per cletg ein ins buca ius pli lunsch che alla inventarisaziun. Gia l'entschatta fevrer 1853 ei la Cadi, sut mistral Dr. Augustin Condrau, seviulta alla regenza grischuna ed alla commissiun cantunala. Aschia ein ulteriuras tentativas encunter la claustra vegnidas retenidas.

Pér suenter che quels nibels eran seretratgs ed igl onn 1852/53 ha saviu vegnir numnaus in ventireivel, ei prof. Condrau returnaus en siu plaid final digl onn 1853 anavos a quellas difficultads: «Aunc avon in onn», aschia plaida igl oratur, «era beinenqual cor tribulaus, temend e sminond che la spada da Damocles pendi sur il tgau dalla venerabla Desertina e beinencualin carteva, ch'ei detti negin seveser legreivel denter quels sogns mirs pli». Continuond di el ch'ins hagi stoviu temer, «ch'ei detti mo ina alternativa pli, che la scola stoppi puspei serrar las portas ni che la davosa ura dalla 1238 onns veglia abbazia hagi dau. Trest patratg ch'ei deigi esser in delict statal, el 19. secul, da tener ina scola catolica, de tener ella en la veglia libra Rezia, de tener ella en questas sontgas hallas» d'ina claustra culs avats Attinghausen, Putnengia e Schnagg, ils fundaturs dallas Ligias e dalla libertad. En certs cantuns destrueschien ins las claustras sco malnizeivlas corporaziuns, en auters pervia da lur benedicziun e da lur operar pil cuminetel. Denton seigi ins sefidaus dil pievel catolic, e dalla toleranza e dil senn per giustia dils confrars reformai dalla commissiun d'educaziun, dil Cussegl grond e dalla regenza e seigi buca secuglienaus. «Il conclus dil Cussegl grond dil fenadur ha schau valer giustia a nossa claustra, ha consolidau nossa scola e segirau ina honorifica existenza.»

Prof. Condrau engrazia agl avat ed al convent per la recepziun e defensiun dalla scola. La scola seigi buca in hosp, mobein in fugitiv. Era per la claustra vali il plaid dil herox da Sempach: «Pli bugen murir en honur che viver en zanur».

Il plaid final da 1853 ha buca mo regurdau allas difficultads e travaglias vargadas, mobein era dau in'egliada plein speranza egl avegnir: «Sereins ei il tschiel e quella cotschnur vespertina dad oz annunzia bialaura. «Prof. Condrau ha circumscret igl intend dallas scolas ed ha tschentau si il principi: *Buca savida, mobein educaziun.*

Il pensum sappi buca consisten enten emplenir la giuventetgna cun da tutta savida ed interessar ella sulet per la scienza, mobein enten communicar savida che nobilifichescha spert e cor. Secapescha hagi la lavur educativa sias difficultads: «Ella garegia entusiassem e carezia, ella pretenda sacrifici e snegaziun da sesez, ella pretenda magisters che, lunsch dal cunfar dil mund, enqueran lur honor sulet en la scola, ella pretenda mussaders, che educheschn buca mo cun plaid, mobein en emprema lingia tras lur exempel. Plaid muentan mo, exempels traian.» Aschia sa mo in plidar, che realisescha sez igl ideal ch'el ha designau.

Aunc in tierz plaid da scola, quel da 1856, cura che la scola episcopala ha serrau sias portas ed ei vegnida translocada a Schwyz, ei conservaus a nus. Era in seminari pign a S. Leci a Cuera ei vegnius fundaus. Il menziunau plaid final ei denton buca conservaus a nus egl original tudestg, mobein ella translaziun romontscha tras in stampat da tschun paginas. Quella veva per fin da rectificar faulsas interpretaziuns, che principalmein il «Grischun» era selubius.<sup>48</sup> Prof. Condrau dilucidescha la historia dalla scola, daventada necessaria per cun la fusiun dallas duas scolas cantunales a Cuera 1850. Essend che la scola seigi buca ina dressura, mobein ina educaziun religius-morala, sappi ins buca simplamein surschar ella al stat. Dacheu darivi era la agitaziun encunter la claustra e sia scola. Il niev institut hagi purtau alla claustra nova popularitad e quei hagi endridau mintga onn ils adversaris da proclamar lur «ceterum censeo Desertinam esse delendam». Per prevegnir alla imminente suppressiun violenta dalla claustra, hagi igl uestg serrau la scola. Schebein quei seigi per avantatg ni disavantatg dalla abbazia, vegni il futur a mussar. «En scadin cass eis ei ina gronda honor per la scola, che ella ha buca stoviu ceder ord munconza da forza, mobein sulet pervia da sia situaziun critica e muort influenza da surengiu.» L'idea d'ina scola confessiunala stoppi denton restar. «Vul la claustra segirar pigl avegnir sia existenza, sche ei la scola il meglier mied leutier, la pli segira garanzia».

La soluziun dalla scola episcopala a Mustér 1856 ha silmeins giu igl avantatg, che la claustra stueva ussa buca pli parer alla re-

<sup>48</sup> Archiv Condrau, senza tetel, mo cun la titulaziun: Honoratissima rimnada. 5. paginas. Comp. Bibliografia Retoromontscha 1938 Nr. 706

genza sco «spina els egls», essend ch'ella fageva ussa negina concorrenza pli cun la scola cantunala. Mo havevan ins era stoviu constatar, che la situaziun dalla abbazia era en risguard spirtal buca dil tut cuntenteivla. Cun sincera dolor ha prof. Condrau priu enconuschientscha da quei ed ei gia la primavera 1855 seviults al representant papal Bovieri a Lucerna en favur dalla claustra e dalla scola, e lu puspei 1856 al preses dalla congregaziun benedictina, agl avat Heinrich Schmid a Nossadunneun.<sup>49</sup> Questas stentas han lu giu negin success e tonaton han ellas fatg attents las instanzas responsablas sin la precara situaziun. Sco buc in auter aber vegn professor Condrau era egl avegnir a ver in egl aviert per la casa da S. Placi.

### 6. *La viulta alla publicistica*

Sco professor e recter dalla scola episcopala veva Condrau buca peda per la schurnalistica. Pér la translocaziun dalla scola a Schwyz igl atun 1856 ha dau agl um activ la necessaria libertad. Igl impuls denton ei vegnius d'ordeifer, dalla curia episcopala a Cuera. Quella veva insinuau el da fundar ina gasetta catolica. Per quest intent ei Condrau viagiava il december 1856 a Cuera, nua ch'ina illustra societad ei seredunada: Il vicari general dalla diocesa, pader Teodosi Florentini, il cancelier episcopal Gion Battista Casanova, lu Remigius Peterelli, il fetg renconuschiu politicher e menader dalla partida conservativa, barun Gion Heinrich Demont, directur dalla policia cantunala, e lu aunc ils dus frars, Joseph Cristian Depuoz, inschignier, ed il giurist Simon Depuoz.<sup>50</sup> Per cussegl da quels signurs ha Placi Condrau surpriu dad edir cun Daniev 1857 la «Nova Gasetta Romonscha». Il redacter ha denton giavischau da quels iniziants da vegnir sustenius tras collaboraziun. Mo gia lu ha

<sup>49</sup> Archiv Condrau, Bovieri resp. Avat Heinrich a Pl. Condrau. Lucern, resp. Nossadunneun, ils 22 da matg 1855 resp. ils 6 da mars 1856. L'ulteriura corrispondenza ed il decuors historic dalla claustra vegn ina lavur speciala a tractar.

<sup>50</sup> Sur las personalitats sesanflan el lexicon historic-biografic dalla Svizzeria las pli necessarias indicaziuns. Arriguard Peterelli mira era J. Robbi, «Die Standespräsidenten des Kantons Graubünden 1917, pg. 59 s. Sur ils frars Depuoz mira Monssen M.M., Die Ilanzer Schwesternkongregation 1950 pg. 44 — 46. Arriguard Simon Depuoz, che ha studigiau 1847 a Bonn, mira Freiburger Geschichtsblätter 1957/58 pg. 129 e Bündner Monatsblatt 1914, pg. 49

Simon Depuoz detg ad el: «Sefidei mo sin sesez e buca sin agid d'auters, tschelluisa secugliunan Els». Condrau ha aggiunsiu a siu pro memoria, al qual nus referin, ils plaid: «Las posteriuras experienzas fatgas han per leider mussau, che quei signur hagi giu raschun e quella saluteivla admoniziun lessel jeu era schar anavos a mes successurs. Mo cheutras sun jeu restaus in schurnalist ton pli libers ed independents.»

Redacter Condrau ha cumprau la stamparia episcopala a Cuera e schau transportar ella a Mustér. Igl ordinariat resp. il vicari general Teodosi Florentini haveva empermess da schar stampar tier el mandats e formulars da batten e mort. Ils emprems onns ei quei daventau, pli tard denton, muort autras circumstanzias, tralasciau. Nuotatonmeins ha la gasetta priu in ventireivel svilup. Surlunder fa il redacter 1892 e 1896 suandontas indicaziuns. El ha entschiet cun ina ediziun da 350 (resp. 400) exemplars, che ei carschida tochen 1892 sin 1800 e 1896 sin 2000.<sup>51</sup> Leutier ei da remarcar, che la redacziun tarmetteva mai numeras u successiuns sin emprova, mobein spedeva la gasetta mo a quels che vevan empustau ella. Perquei veva la spediziun era mai difficultads dad incassar igl abbonement.

Daco il grond success da quella gasetta? Perinaga era Condrau veramein in *redacter* cun tgierp ed olma. Schurnalistica era per el clamada, gie sontga obligaziun. Fetg scolaus possedeve el era in intern interess vid la veta publica ed el capeva era da tschaffar ses patratgs els dretgs plaid. Cun raschun ha in contemporan remarcau, che Placi Condrau havevi in viv temperament, ina aveina sanguinica, che laschavi exprimer el tgunsch ses patratgs, gest il cuntrari da siu frar dr. Augustin. La sera mava el mintgamai tier ils hosps el hotel dalla Cruna per sediscuorer cun els sur tuts interess ed ideas. Quei ch'el saveva duvrar ordlunder, applicava el per sia redacziun. Mo punct las nov, scheva el buna notg e svaneva.<sup>52</sup>

Condrau ha gudignau ses lecturs era tras sias *ideas democraticas*. Nus vein viu che gia siu bab patertgava aschia. La dimora da studi el marcau allas rivas dalla Isar han rinforzau questa direcziun. Gia 1857 e puspei 1861 ha el declarau ch'el defendi aviartamein «ils

---

<sup>51</sup> Las empremas indicaziuns ein pridas ord la pro memoria 1892, las autras ord «Schweizer Presse» 1896

<sup>52</sup> Reminiscenzas d'in vegl curant da Mustér, Mustér 1929, pg. 4 s.

dretgs ed interess dils catolics e vegni sin intschess politic a semusar liberal-conservativs.»<sup>53</sup> Consequent ed adina puspei ha el battiu per l'augmentaziun dils dretgs dil pievel. Aunc 1896 ha el motivau questa posiziun, che «la tgina dil referendum» seigi stada ella veglia libra Rezia. Schegie ch'el era lu in um vegl da 78 onns, giavischava el nuot pli fetg, che la elecziun dil Cussegl federal entras il pievel. Il di che quei daventi, vegli el lu bugen murir cul vegl Simeon. Vess Condrau viviu en nos dis, vess el forsa era, sco in auter idealist, cusseglier federal Giuseppe Motta, rut ina lontscha per il dretg da votar dallas femnas.

Ella medema revista da 1896 declara Pl. Condrau siu success schurnalistic cun siu quitau dad adina luvrar per la *pasch confessionala* tenor il plaid: «Essan nus buca d'accord ella cardientscha, lein nus silmeins esser units ella carezia». Perquei ha sia gasetta era giu dalla entschatta enneu in considerabel diember d'abonnents reformai.<sup>54</sup>

Tgei ha Placi Condrau contonschuiu cun sia gasetta? Nus dein il plaid ad in historicher dalla schurnalistica: «La fundaziun e l'emprema activitad dalla Gasetta Romontscha croda en in temps ch'igl effect dalla veglia autoritad dallas famiglias aristocratas, ussa daventadas liberalas, era aunc adina buca survivius dil tut. Ina remarcablidad era ei, che cumins dil tut conservativs e stregn catolics sco la Cadi e la Lumnezia elegevan deputai liberals ed anticlericals el Cussegl grond ed ella assemblea federala. Alla influenza ed alla inschignusa redacziun dalla Gasetta Romontscha eis ei reussiu, da perschuer plaunsiu il pievel catholic romontsch da sia principiala inconsequenza. A quei resultat han naturalmein las relaziuns contribuuiu buca pauc, mo alla Gasetta Romontscha eis ei en emprema lingua d'atribuir, che la gruppaziun da partida tenor famiglias en Surselva ei vegnida midada en ina tala tenor principis.»<sup>55</sup>

Sia gasetta ha redacter Condrau era tschentau nunstunclenteivlamein e senza tema el survetsch dil *mainteniment dalla claustra da Mustér*. Tgi che sfeglia ils volums, anfla impurtontas serias d'arte-

<sup>53</sup> Nova Gasetta Romontscha nr. 10 dils 7 da mars 1861

<sup>54</sup> Brev da Condrau dils 24. da zercladur 1896, publicada en Schweizer Presse 1896

<sup>55</sup> J. Candreia, Die romanische und italienische Journalistik Graubündens, en Schweizer Presse 1896 pg. 486

chels. E buca avunda cun quei eis el era semess en correspondenza cul preses dalla congregaziun benedictina svizzera en favur dalla carezada abbazia dapli 1856 e dapli 1860 era tier igl uestg da Cuera. Quei tut denton pretenda ina pli detagliada descripziun enteifer il rom dalla historia claustrala. Ei fuss en scadin cass falliu, less ins attribuir la restauraziun dalla claustra ed era il svanir dil liberalissem politic en Surselva sulettamein a Caspar Decurtins, ch'ei comparius in bien ton pli tard sil camp. La stentusa lavur da pionier ha onns en ed onns ora il Görres dalla Surselva Grischuna pre-stau: Il patriarch dils redacters romontschs, morts ils 22 da november 1902 ella vegliadetgna dad otgontaquater onns, il Placi Condrau.